



SIARAN AKHBAR KENYATAAN DASAR AMBD 1/2020

1. Autoriti Monetari Brunei Darussalam (AMBD) telah mengeluarkan Kenyataan Dasar AMBD bagi separuh pertama tahun 2020 pada hari ini.
2. Dalam kenyataan dasar tersebut, AMBD mengongsikan bahawa kadar pertumbuhan ekonomi global dijangka akan menurun sebanyak 4.9% bagi tahun 2020. Ekonomi domestik pula telah meningkat sebanyak 3.9% tahun-ke-tahun pada 2019. AMBD meramalkan kadar inflasi domestik adalah dalam lingkungan 1% ke 2% bagi tahun 2020.
3. AMBD juga memaklumkan bahawa walaupun berada di dalam persekitaran ekonomi yang tidak menentu, sektor perbankan negara terus kekal berdaya tahan pada suku pertama tahun 2020. Dialog secara berterusan telah diadakan dengan pihak-pihak yang berkepentingan, termasuk Kementerian Kewangan dan Ekonomi (MoFE) dan Persatuan Bank-Bank Brunei (BAB) dalam menangani kesan pandemik COVID19 terhadap ekonomi negara. Beberapa langkah *interim* telah diperkenalkan yang bertujuan untuk mengurangkan tekanan kewangan yang dihadapi oleh syarikat-syarikat perniagaan serta individu-individu yang terkesan.
4. AMBD akan sentiasa memastikan kecairan yang mencukupi untuk memastikan sistem kewangan akan dapat terus berfungsi dengan baik menerusi pengenalan langkah-langkah tambahan pengurusan kecairan bagi bank-bank tempatan.
5. Sebagai komitmen AMBD untuk meningkatkan rejim pengawalseliaan bagi perlindungan pemegang-pemegang polisi insurans/ Takaful di Negara Brunei Darussalam, AMBD telah mengeluarkan 3 notis dan garispanduan pada suku pertama tahun 2020. Ini termasuk garispanduan untuk menyediakan pelan pemulihan (*recovery plan*) bagi syarikat insurans dan pengendali Takaful; garispanduan pengedaran secara dalam talian bagi syarikat insurans dan pengendali Takaful; dan garispanduan bagi pengedaran lebihan bagi pengendali Takaful.
6. AMBD juga telah mengeluarkan *Notice on Providing Market Access to a Foreign Market* bagi pemegang-pemegang *Capital Markets Services Licence* pada 4 November 2019. Pemeriksaan *on-site* kali kedua telah selesai dijalankan dengan menggunakan metodologi penyeliaan berasaskan risiko (*risk-based supervision*) terhadap pengawalseliaan *capital market intermediaries* pada suku pertama 2020.
7. Beberapa inisiatif di bawah *Digital Payment Roadmap for Brunei Darussalam 2019-2025* sedang giat dijalankan. Ini, antaralainnya, termasuk penubuhan infrastruktur *Payment Hub* yang akan membolehkan para pengguna untuk membuat pembayaran secara digital. Kerjasama dengan pihak berkepentingan seperti Majlis Ekonomi Digital akan sentiasa dilaksanakan untuk memastikan matlamat bagi projek tersebut adalah selaras dengan inisiatif-inisiatif negara.
8. Dengan pengeluaran notis mengenai pelan pemulihan bank pada 20 Disember 2019, bank-bank dikehendaki untuk menghadapkan pelan pemulihan (*recovery plan*) masing-masing kepada AMBD sebelum 30 September 2020. Ini bertujuan untuk memastikan kesiapsiagaan bank-bank untuk sentiasa berdaya tahan dalam menghadapi sebarang tekanan.

9. AMBD akan terus memantau perkembangan situasi COVID19 dan berkerjasama dengan institusi-institusi kewangan untuk mengenalpasti langkah-langkah yang diperlukan untuk memastikan perkhidmatan kewangan akan terus berfungsi secara teratur. AMBD juga bersedia untuk melaksanakan langkah-langkah tambahan, jika perlu, demi menjaga kestabilan kewangan Negara Brunei Darussalam.
10. Kenyataan Dasar AMBD 1/2020 yang lengkap boleh didapati di laman sesawang AMBD di www.ambd.gov.bn.

Autoriti Monetari Brunei Darussalam

Reference : AMBD/COMMS/3

Date : 16 Zulkaedah 1441H/ 8 Julai 2020M